

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst ("Službene novine Zeničko-dobojskog kantona", broj: 7/10 i 3/23), na prijedlog Ministarstva za pravosuđe i upravu, Vlada Zeničko-dobojskog kantona, na 26. sjednici, održanoj dana 10.05.2024. godine, d o n o s i

ZAKLJUČAK

I.

Utvrđuje se Prijedlog Zakona o izmjenama i dopuni Zakona o plaćama i naknadama u organima vlasti Zeničko-dobojskog kantona.

II.

Prijedlog Zakona iz tačke I. ovog zaključka upućuje se u dalju skupštinsku proceduru po skraćenom postupku.

III.

Zaključak stupa na snagu danom donošenja.

Broj: 02-_____/24
Datum, 10.05.2024. godine
Zenica

PREMIJER

Nezir Pivić

DOSTAVLJENO:

1x Ministarstvo za pravosuđe i upravu,
1x Stručna služba Skupštine,
1x a/a.

PRIJEDLOG

Na osnovu člana 37. stav 1. tačka f) Ustava Zeničko- dobojskog kantona Skupština Zeničko- dobojskog kantona, na ____ sjednici održanoj dana _____ 2024. godine, d o n o s i:

ZAKON O IZMJENAMA I DOPUNI ZAKONA O PLAĆAMA I NAKNADAMA U ORGANIMA VLASTI ZENIČKO-DOBOJSKOG KANTONA

Član 1. (Izmjena člana 11.)

U Zakonu o plaćama i naknadama u organima vlasti Zeničko- dobojskog kantona („Službene novine Zeničko-dobojskog kantona“, broj: 1/18, 10/19 i 11/19-ispr., 8/22 i 4/24, u daljem tekstu: Zakon), u članu 11. stav (3) riječi „službenog puta,“ se brišu.

Član 2. (Dodavanje novog člana 25a.)

Iza člana 25. dodaje novi član 25a. i glasi:

„Član 25a. (Naknade po osnovu pripravnosti)

Državnom službeniku i namješteniku pripada naknada po osnovu vremena provedenog u pripravnosti za rad i naknada za rad u toku pripravnosti, čija će se visina i način ostvarivanja propisati uredbom Vlade Kantona.“

Član 3. (Izmjena člana 27.)

U članu 27. stav (3) riječi „službenog puta,“ se brišu.

Član 4. (Izmjena člana 34.)

Član 34. mijenja se i glasi:

„Član 34 (Naknada za slučaj ozljede na radu, teške bolesti i invalidnosti)

U slučaju ozljede na radu, teške bolesti i invalidnosti državnog službenika ili namještenika, ili člana njegove uže porodice, isplaćuje se novčana pomoć, čija će se visina i način ostvarivanja propisati uredbom Vlade Kantona.“

Član 5. (Prijelazne odredbe)

Vlada Kantona dužna je podzakonske propise utvrđene ovim zakonom donijeti u roku od 60 dana od dana stupanja na snagu ovoga zakona.

Član 6.
(Stupanje na snagu)

Ovaj zakon stupa na snagu narednog dana od dana objavljivanja u „Službenim novinama Zeničko-dobojskog kantona“.

Broj:
Datum:
Z e n i c a

PREDSJEDAVAJUĆI

Ćazim Huskić

O B R A Z L O Ž E N J E

PRAVNI OSNOV

Pravni osnov za donošenje Zakona o izmjenama i dopuni Zakona o plaćama i naknadama u organima vlasti Zeničko-dobojskog kantona sadržan je u članu 37. stav 1. tačka f) Ustava Zeničko-dobojskog kantona u kojem je propisano da Skupština Zeničko-dobojskog kantona donosi zakone i druge propise iz nadležnosti kantonalnih organa.

RAZLOZI ZA DONOŠENJE

Vlada Zeničko-dobojskog kantona je svojom Odlukom usvojenom na 20. sjednici Vlade, održanoj dana 08.03.2024. godine, dala saglasnost na Ugovor o pristupanju Kolektivnom ugovoru za službenike organa uprave i sudske vlasti u Federaciji Bosne i Hercegovine („Službene novine FBiH“, broj: 98/23 – u daljem tekstu Kolektivni ugovor).

Članom 34. Kolektivnog ugovora propisano je da dnevnicu za službeni put ne isključuje topli obrok i naknadu za odvojeni život od porodice i naknadu troškova smještaja, osim u slučajevima kada se službeni put obavlja van mjesta rada za koje se prima naknada za odvojeni život.

Članom 27. Kolektivnog ugovora propisano je da radniku pripada naknada po osnovu vremena provedenog u pripravnosti za rad.

Obzirom na navedeno, a kako bi se izbjegle eventualne nedoumice u pogledu primjene odnosno uspostave određenih prava za državne službenike i namještenike utvrđuje se Prijedlog Zakona kao u tekstu.

U skladu sa članom 140. Poslovnika Skupštine Zeničko-dobojskog kantona - Četvrti prečišćeni tekst („Službene novine Zeničko-dobojskog kantona“, broj: 5/24), predlaže se upućivanje Prijedloga Zakona o izmjenama i dopuni Zakona o plaćama i naknadama u organima vlasti Zeničko-dobojskog kantona u skupštinsku proceduru po skraćenom postupku, u formi prijedloga, obzirom da nije u pitanju obiman i složen zakon.

Napominjemo, da će se o Prijedlogu Zakona po skraćenom postupku, Skupština Zeničko-dobojskog kantona izjasniti kao o prethodnom pitanju tijekom rasprave o dnevnom redu. U slučaju da Skupština ne prihvati predloženi prijedlog Ministarstva za pravosuđe upravu da se predloženi tekst Zakona razmatra po skraćenom postupku, odnosno kao prijedlog s istim se postupa kao s nacrtom i o tom nacrtu odmah će se vršiti rasprava.

OBRAZLOŽENJA POJEDINIH PRAVNIH RJEŠENJA

Članovima 1. i 3. izvršena je izmjena člana 11. odnosno člana 27. obzirom da je odredbama člana 33. Kolektivnog ugovora kojim je propisano je da državnom službeniku ili namješteniku pripada naknada za službeni put (troškovi prevoza, troškovi prenoćišta i troškovi korištenja privatnih automobila u službene svrhe) po cijeni prevozne karte i hotelskih računa za hotele do četiri zvjezdice i dnevni troškovi u obliku dnevnice za službeno putovanje na način i visini utvrđenim posebnim propisima, dok je članom 34. Kolektivnog ugovora propisano je da dnevnicu za službeni put ne isključuje topli obrok i naknadu za odvojeni život od porodice i naknadu troškova smještaja, osim u slučajevima kada se službeni put obavlja van mjesta rada za koje se prima naknada za odvojeni život.

Član 2. Prijedloga Zakona – dodavanjem Člana 25a. Zakona utvrđuje se pravo državnim službenicima i namještenicima na naknadu po osnovu vremena provedenog u pripravnosti a čiju će visinu urediti Vlada Zeničko-dobojskog kantona svojom Uredbom.

Član 4. Prijedloga Zakona utvrđuje pravo državnog službenika i namještenika na naknadu u slučaju ozljede na radu, teške bolesti i invalidnosti, a čiju će visinu urediti Vlada Zeničko-dobojskog kantona svojom Uredbom.

Članom 5. Prijedloga Zakona utvrđena je obaveza Vlade Kantona da u roku od 60 dana od dana stupanja na snagu Zakona donese podzakonske propise.

Član 6. Prijedloga Zakona - propisuje stupanje zakona na snagu narednog dana od dana objavljivanja u „Službenim novinama Zeničko- dobojskog kantona“.

POTREBNA FINANSIJASKA SREDSTVA

Za donošenje Prijedloga Zakona o izmjeni Zakona o plaćama i naknadama u organima vlasti Zeničko- dobojskog kantona, finansijska sredstva su sadržana u Budžetu Zeničko-dobojskog kantona za 2024. godinu. Ukoliko se kod pojedinih budžetskih korisnika eventualno u toku budžetske godine pojavi potreba za dodatnim finansijskim sredstvima za primjenu ovog zakona, ista će se obezbijediti preraspodjelama sredstava i uštedama u okvirima budžeta za 2024. godinu.